

Maria Culastia Berther, Tujetsch



AB. Sco davosa d'ina gronda famiglia eis ella ida ord casa – la Culastia dil Mistral. Oz ei la casa ch'era a sias ûras plein veta e deva suittetg ad in grond marighel d'affons, vita e metta.

Culastia Berther ei naschida ils 23 da matg 1917 a Camischolas. Ell'ei stada il 7avel affon dils geniturs: Mistral Vigeli Berther e Marta, nata Flury. En semplas relaziuns purilas ha la defuncta passentau sia affonza e siu temps da scola. El ravugl d'ina numerusa famiglia eisi mai manco da lavur – ed aschia ha era la Culastia stuiu s'engaschar ad uras e gidar nua ch'ei fageva basegns.

Strusch era il cuort temps da scola spiraus, vev'e num prender il sac ed ir fumitgasa tier quei ni tschei pur. Duront

il temps da giuventetgna ha la trapasada stuiu serender egl jester e segidar culs da casa. Il bien temps vegl era ualti fadigius, mo il spért da solidaritat culla famiglia deva da l'autra vart forza, satisfacziun e cumentientscha.

Secapescha, il pli bugen era la Culastia en famiglia, en siu vitget cun ses attaschais vischins. Ed en verdad, la finala eis ella adina stada a casa e giu quita entochen che l'entira famiglia ei stada navèn. – Suenter la mort da sia cara mumma, 1952, ha ella surpriu il percasa e giu bien quita per ses frars pli giuvens e siu bien bab. Denton ein era quels frars sgulai ora e surura ei la cara defuncta stada persula cul bab ch'ella ha tgirau entochen la mort 1964. Tonta renunzia personala, ton sacrifici per fargliuns e geniturs meretan respect ed engraziament!

Biars onns ei la cara defuncta lu stada persula. Ella ha denton adina tgirau buñas relaziuns cun ses parents e sia vischionza ed ha era giu cor aviert per sias vi-setas. Detg cuortamein: ella ei stada ina femna da bien plaid e fatg che deva buñen ina discurrida.

Ils davos onns ei la Culastia stada empau fleivla e maldisposta. Ella ha stuiu ver tut quita da sia sanadad. Per schar urentar ina gada pli da rudien fuva ella era serendida ils 24 d'avrel el Spital regional a Glion, nua ch'il Tutt-pussent ha clamau ella in di pli tard nun-spitgadamein tier El. Ella rauassi en pasch!

GR 15. 1. 87